



Communicaziun a las medias

28avel Top Pop Rumantsch: In blues sur il cunfin

Cuira, 02-03-2012 – **Il novischem 28avel Top Pop Rumantsch deriva dal chantatur Cha da Fö e dechanta il grond «Cunfin». Il Top Pop Rumantsch vegn preschentads per l'emprima giada ussa sonda, ils 03-03-2012 el “magazin da cultura” dal Radio Rumantsch.**

«L'increschantüm quella sa spettar» - ina frasa clav en il nov Top Pop Rumantsch, preschentà dal trubadur ladin Cha da Fö alias Roland Vögtli. Pelvair flada questa chanzun pauc da la chara lingua e bler dal vest selvadi imaginar. Igl è in blues basic e rudimentar, cun in accent american ed ina ghitarra che planscha dal plaschair. Cumponì en «chadafös» tranter Scuol, Cuira e Minca, projectescha il toc in «cunfin» ristgadain surpassà, laschond lunsch davos sai betg mo il solit intschess da chatscha e l'encreschadetgna proverbiala, mabain er bleras aventuras musicalas - sco per exempel la gruppa da rock tempriva AndaRojo. «La fin da la chanzun è averta ed jau ma sent sco en in nov cumenzament», commentescha Cha da Fö sia bravura. “Cunfin”, il Top Pop Rumantsch è d'udir exclusivamain en il Radio Rumantsch.

Roland Vögtli (30) è naschì e creschì a Scuol. Dapi trais onns lavura el sco redactor da musica tar RTR Radiotelevisiun Svizra Rumantscha a Cuira. Sia activitad da musicist reparta el sin dus binaris, dad ina vart il rockadur da vaglia, actualmain cun il quartet sonic NAU (battesim dal primalbum ils 9 da mars al Selig a Cuira), d'otra vart appunta il chantatur cun il num d'art Cha da Fö, preschent proximamain er en la turnea trans-rumantscha «chant au tour».

Musica e text, chant: Cha da Fö
Producziun: Manfred Zazzi e Cha da Fö
Ghitarra: Mario Capitanio
Bass: Dany Hertach
Battaria: Rolf Caflisch



Cunfin

i'm es i sü üna glüm
il vaincher es crodà
inchün ha trat il gialin
il tun m'ha be blessà
deliberada es la bes-cha
i nu'm interessa che chi vain quintà
eu fetsch viadi sur cunfin
ed eu nu sa sch'eu dess tuonar

ingio es il cunfin?
in meis cheu in meis cour eu nu sa!
ingio es üna fin?
in meis cheu in meis cour quai nu da!
perche ün cunfin?
quel ans strangla la libertà!
ingio es il cunfin?

a l'orizont nascha il sulai
eu sun cuntaint e plain ricchezza
eu n'ha gust da far viadi
l'increschantüm quella sa spettar
eu nu'm saint plü co ün giat
chi'd es serrà in abitaziun
e chi vess jent dad ir a chatscha
e manar a chasa il butin
deliberada es la bes-cha
i nu'm interessa che chi vain quintà
eu fetsch viadi sur cunfin
ed eu nu sa sch'eu dess tuonar!

Top Pop Rumantsch è ina seria da producziuns da musica nova ed actuala, lantschada da RTR Radiotelevisiun Svizra Rumantscha l'onn 2005. Tut ils titels da la seria èn da udir sin la pagina da RTR: <http://www.rtr.ch/home/dossiers/actual/Top-Pop-Rumantsch.html>

Dapli infurmaziuns:

Radiotelevisiun Svizra Rumantscha
Jachen Prevost
Manader redacziun da musica
Tel. 081 255 75 75
E-Mail: jachen.prevost@rtr.ch